

tissima vascula illa Sinensia, quæ porcellana dicunt, conficiantur, quæ pagus ille non modo toti huic extremæ Asiæ, sed & reliquo orbi, ea, quam jam videmus, copia supeditat, de quibus fufius mox suo loco. Piscium etiam in hac Provincia vis ingens præcipue salmonum, trutarum, & acipenserum: horum ego unum appendentem centum & sexaginta libras sex Iuliis seu regalibus Hispanicis quandoque emi, & trutam decem librarum triario, seu tribus assibus; sed plura de his figillatim ad urbes singulas.

Lien florum descriptio.

Quia vero Lien florum sæpe mentionem feci, & illis hæc Provincia maxime abundat, breviter hic eos describo, nec enim flores tantum, sed & fructus siccatos cum reliquis communicat provinciis: flos hic, qui à Sinis Lien dicitur, à Lusitanis Fula de Golphon, in aquis stagnantibus, quarum sedimentum limum efficit, crescit, ad duos tresve cubitos aquæ superficiem supereminet, duris fortioribusque stolonibus adnexus, una sæpe radix plures flores fert, dantur coloris varii, purpurei, albi, mixti, rubri alique similes: lilia nostra magnitudine superant, ac longe magis pulchritudine, cedunt tamen illis odoris, quo carent, fragrantia; tulipam maximam diceret, à qua figura non admodum discrepat, nam etiam cum folia aperit, repandi lili figuram habet, quin & foliis striatis & ab angustis in latitudinem paulatim se laxantibus effigie calathi est, resupinis per ambitum labris, tenuique filo, & stantibus in medio globulis velut lili crocis: post florem fructus sequitur figura plane conica, qui magnitudine palmam manus excedit, crassitie pugnum: coni huius vertex seu acumen petiolo, cui flos adhærebat, annexum est, basis cælum respicit, in qua folliculi seu domunculæ variæ sunt, intra quas multiplex fructus continetur, ita ut solus vertex promineat: huius moles elliptica avellanas, fabasque nostras majores æquat, unde nil mirum si hunc fortasse fructum Dioscorides fabam Ægyptiam dixerit, armatur fructus cortice viridi, molliori tamen, intus nucleus est albus optimique saporis, tum cum recens est, tum cum exsiccatus: à Sinicis medicis optimæ habetur notæ, magnarumque ad alimentum virium, unde debilioribus eum passim post ægritudinem convalescentibus offerunt: folia stirpis maxima sunt, & plerumque figuræ rotundioris, aquæ superficiem incubantia ac supernatantia, ut nymphæ nostratis solent, longioribus petiolis radici alligantur, subinde

ad duorum palmorum longitudinem extensam diametrum habent. sæpe hisce similia folia in stagnantibus etiam Europæis aquis videre me memini, at non item florem aut fructum: hæc folia ubi exsiccata fuerint, olitoribus, scrutariis, aliisque minorum similium rerum propolis loco papyracei involucris aut cuculli sunt, quibus merces divenditas infarciunt; sed & ipsa radix præclara est, suumque habet usum, quippe ad brachii humani crassitiem sæpe excrescit, duosque aut tres cubitos intra limum subtilissimum delitescit: tota geniculis atque internodiis distincta est ad modum cannarum aut arundinum, cum autem exterior ejus cortex plane integer sit, medulla ipsa seu caro magnis quasi canalibus intus perforata est, caro albissima carduum nostratem, licet nonnihil magis insipida sit, refert, atque æstivo tempore, quod frigidiuscula sit, in deliciis ac pretio est; unde nihil non in hac planta utile est, ac prorsus res amoenissima integros sæpe videre lacus floridos, non sylvestribus illis minimeque frugiferis, sed manibus hominum satis, domesticisque floribus, quorum cultura singulis annis renovatur, semenque intra ipsas aquas projicitur, quin imo in hortis ac viridariis, & in ipsis palatiorum atriis intra vasa testacea ingentia limo & aqua repleta excolunt, ac educant magnates, illorum tum pulchritudine, tum amoenitate allekti.

Prima Urbs seu Metropolis

N A N C H A N G.

N Anchang urbs, quamvis non sit ex maximis illis maximeque celebribus, nobilis tamen est litteratorum multitudine, nec adeo parva, quin ut minimum duo milliaria ambitu suo contineat: in hac, quod nusquam alibi comperi, duo simul reges habitavere è Taiminga familia; ac Societas nostra templum sat splendidum, vero Deo consecratum, domumque pro loci opportunitate sat commodum habuit: nisi quod, cum à Tartaris post primam interceptionem iterum defecisset, tota ab iis flammis tradita sit, ita ut præter moenia vix quidquam integrum remanserit; sed denuo jam restaurata proregem reliquosque magistratus iterum obtinet, non tamen sacerdotem aut templum, quod hætenus operarum non permisit ibi penuria.

Jacet urbs ad magni lacus Poyang initium

Y

Situs ac nobilitas.